

東坡先生全集卷之五十八

尺牘

與沈睿達二首

以下俱黃州

某啓近辱書伏承退居安隱尊候康健甚慰所望
某去歲不記日月遞中奉書并封公擇小簡去謂
必達今承示諭豈浮沉耶某今年一春臥病近又
得時疾逾月方安浮念灰滅無餘頽然閉戶又非
復相見時意思矣臨紙惘惘乍熱惟萬萬自重不
宣

二

某啓公所須拙文記雲巢向書中具道矣恐不達
故再云云某自得罪不復作詩文公所知也不惟
筆硯荒廢實以多難畏人雖知無所寄意然好事
者不肯見置開口得罪不如且已不惟自守如此
亦願公已之百種巧辨均是綺語如去塵垢勿復
措意爲佳也令子今在何許漸就遷擢足慰遲暮
小兒亦授德興尉且令分房減口而已孫運判行
病起乏力未能詳盡

與李知縣一首

北歸

某啓近奉狀必達比日伏計起居佳勝旱勢如此

撫字之懷想極焦勞舊見太平廣記云以虎頭骨
縋之有龍湫潭中能致雨仍須以長縆繫之雨足
乃取出不爾雨不止在徐與黃試之皆驗敢以告
不罪不罪某家在儀真輕騎到此數日却還般挈
須水通乃能至邑中拜見傾企之甚毒熱千萬爲
民自愛不宣

與翟東玉一首

惠州

馬火也故將火而夢馬火也燥燥而不已則窮故
膏油所以爲無窮也藥之膏油者莫如地黃啖老
馬皆復爲駒樂天採地黃詩云與君啖老馬可使

照地光今人不復知此法吾晚學道血氣衰耗如
老馬矣欲多食生地黃而不可常致近見人言循
州興寧令歐叔向於縣圃中多種此藥意欲作書
干求而未敢君與叔向故人可爲致此意否此藥
以二八月採者良如許以此時寄惠爲幸欲烹爲
煎也不罪不罪

與孫運勾一首

某啓脾能母養餘藏故養生家謂之黃婆司馬子
微著天隱子獨教人存黃氣入泥丸能致長生太
倉公言安穀過期不安穀不及期以此知脾胃寧

固百疾不生近見江南老人年七十二狀貌氣力如四五十人問其所得初無異術但云平生習不飲湯水爾常人日飲數升吾日減一合今但霑唇而已脾胃惡濕飲少胃強氣盛液行自然不濕雖冒暑遠行亦不念水此可謂至言不繁聞曼叔比得腫疾皆以利水藥去之中年以後一利一衰豈可數乎當及今無病時力養胃氣若土能制水病何由生向陳彥升云少時得此病服商陸防已之類皆不効服金液丹炙臍下乃愈此亦固胃助陽之意也但火力外物不如江南老人之術爾薑桂

辣藥例能脹肺多爲腫媒不可服有書以告之爲
佳也

與練承議三首

以下俱
杭州

某啓辱回教感服不已數日極寒徒御良苦切惟
起居佳勝早潮不知應否想不出今晚必渡引領
饑渴專遣人候問不宣

二

來日若晚渡酒五行已夜矣本州舊例雖夜已深
人使猶秉燭復謁當夜下書請次日大排不知如
何又二十日正是國忌若待二十一日大排又過

三日勅限不知可打散不坐否乞一一示諭得以預備也

三

某啓中使已到三十里若高麗使只今來辭酒罷却可迎中使老業未盡有如此倉忙望公慈造一言得只今上馬爲幸

與杭守一首

某啓近有自浙中來者頗能道杭人之語數年飢饉若非公盡爲魚鱉螻蟻矣比公之去涕慕殆不可勝公何施而及此欽仰欽仰聞俞主簿者附少

信物如果爲帶得來乞盡底送與范子禮正字偶
索得此冷債信天養窮人也呵呵

不知信物果帶得來此中已打破甕也一噓一噓

與傅質一首

某啓再辱示手教伏審酷熱起居清勝見諭某何
敢當徐思之當不爾然非足下相期之遠某安得
聞此言感愧深矣體中微不佳奉荅草草

與吳君采二首

俱黃州

惠花已領影燈未嘗見與其見此何如一閱三國

志耶

二

近日黃州捕私酒甚急犯者門戶立木以表之臨
臯之東有犯者獨不立木怪之以問酒友曰爲賢
者諱吾何嘗爲此但作蜜酒爾

與高夢得一首

黃州

某啓人來領教開諭累幅足見相屬之厚然稱述
過當皆非敢當僕舉動疎謬齟齬於世旣忝相知
惟當教語其所不逮反更稱譽如此是重不肖之
罪也悚息悚息新闕尤增詠嘆然柏舟之諷何敢
當此諸事幸且慎默於事旣無補益增嫉爾

與孟亨之一首

黃州

某啓今日齋素食麥飯筍脯有餘味意謂不減芻
豢念非吾亨之莫識此味故餉一合并建茶兩片
食已可與道媪對啜也

與程彝仲五首

以下俱
密州

某啓奉別積年因循不修書問每以爲愧適中辱
手書問勞勤厚感戴不可言也承以科詔入都跋
履之餘起居住佳否老兄循習既久文行愈粹決無
終否不振之理更少貶以就繩墨卽當俯拾也未
緣披奉惟冀以時自重不宣

二

得聖此行得失必且歸西計無緣過我而東武任
滿在來歲冬杪亦無緣及見於京師矣此任滿日
舍第亦解罷當求鄉里一任與之西還近制旣得
連任蜀中遂可歸老守死墳墓矣心貌衰老不復
往日惟念斗酒隻雞與親友相從瀚星橋別業比
來更增葺否因便無惜一二字

三
以下俱
湖州

近省榜到郡首承高過歡慰可量沉困累年行業
克富鄉曲榮耀交游喜快甚休甚休春氣暄和奉

東坡全集卷之五十八
計卽日起居安勝御試必更在高等盤桓都下爲
況何如惟順時珍愛

四

某去秋因鄉人自高密過此託致手書不知達否
奉違累歲無緣一接談笑傾仰殊甚榜中鄉人所
識惟吾兄一人其餘豈盡新俊耶車馬必稍留都
下因風無惜惠問

五

黃州

某啓濶別永久多難流落百事廢弛不復通問獨
吾兄不忘疇昔時枉遠書感忤不可言仍審比來

起居佳勝又讀別紙所寄園亭山水之勝廢卷閉
目如到其間幸甚幸甚吾兄潛德晚遇當遂光大
惟厚自愛慰朋友之望某與幼累皆安子由頻得
書無恙元修去亦久矣今必還家所要亭記豈敢
於吾兄有愛惜但多難畏人不復作文字惟時作
僧佛語耳千萬體察非推辭也遠書不欲盡言所
示自是一篇高文大似把鉢叫飢聊發千里一笑
會合無期臨紙淒然

與孫正孺二首

以下俱杭州還朝

數日前因來人奉書必達比日伏想履茲餘熱起

居住勝某已八上章乞郡旦夕必有指麾且輟忙
爲公作得送行詩跋尾以先祖諱故不欲作冠篇
也未由會合千萬保愛

二

某頑健稍勝昔兄眠食不衰否濶遠無他囑惟倍
萬保嗇而已勿將作汎汎常語過耳也千萬千萬
入石時莫用邊花欄界之類古碑惟石上有書字
耳少着花草欄界便俗狀也不罪不罪偶與子由
飲半盞酒便大醉不成字

與李端伯三首

以下俱杭州還朝

自附啓河朔爾後紛紛不獲繼問左右比日伏審
鎮撫之暇台候萬福蜀本易治而或者擾之公旣
深識民情而民亦素服公政切想下車以來談笑
無事行春之樂無由託後乘陪賓客之末但深想
望舍弟鎖宿殿廬未及奉狀

二

張君房助教陵井人本治儒學已而爲醫有過人
者智識通變而性極厚恐欲知之某寵祿過分碌
碌無補久以爲愧近屢請郡未獲若得歸掃墳墓
遂得望見豈勝厚幸但恐政成促召在旦暮爾冗

中不盡區區

三

邑子每來稔聞豈第之政西南泰然不肖與受賜多矣幸甚幸甚小姪千之初官得在麾下想蒙教誨成就也曾拜聞眉士程遵誨者文詞氣節皆有可取不知曾請見否

與歐陽知晦四首

以下俱惠州

某啓近日屢獲教音及林增城至又得聞動止之詳併深感慰桃荔米醋諸信皆達矣荷佩厚眷難以言諭今歲荔子不熟土產早者旣酸且少而增

城晚者絕不至方有空寓嶺海之嘆忽信使至坐
有五客人食百枚飽外又以歸遺皆云其香如陳
家紫但差小爾二廣未有此異哉異哉又使人健
行八百枚無一損者此尤異也林令奇士幸此少
留公所與者故自不凡也蒸暑異常萬萬以時珍
齋不宣

二

合藥須鵝梨嶺外固無有但得凡梨稍佳者亦可
用此亦絕無治下或有爲致數枚無卽已栗子或
蒙惠少許亦幸